

太平寰宇記

第十八冊

太平集序

卷之八

太平寰宇記卷之六十八

河北道十七

保州

定遠軍

乾寧軍

破虜軍

威虜軍

平塞軍

靜戎軍

寧邊軍

保順軍

平戎軍

保州

保州

今理清苑縣

本莫州清苑縣地石晉初割屬契丹蕃

戎立爲泰州至少主開運元年克復泰州二年以滿城縣路當衝要宜立郡庭用威戎虜其泰州宜

移理于滿城其舊秦州復爲清苑縣滿城所置秦
州尋廢皇朝初卻于清苑縣置保塞軍太平興國
六年升爲保州仍割清苑縣屬焉一本秦作秦

領縣一

清苑

四至八到

南至東京一千二百里

西南至西京缺

東至唐口七十里

西至滿城五十里

南至望都 缺

北至靜戎軍四十里

東南至博野寧邊軍一百里

西南至望都九十里

東北至靜戎軍四十里

東北至威虜軍四十里

戶

舊戶在莫州

皇朝戶主二千七百七十五客二千

風俗

同莫州

土產同莫

清苑縣

舊二十五鄉
今十一鄉

本樂鄉縣也史記云漢高祖過

趙問樂毅有後乎對曰有樂巨叔封于樂鄉卽此
屬信都國後漢省後魏復置屬高陽高齊天保七
年省仍自易州滿城界移永寧縣理此城隋開皇
十六年改爲清苑縣因後魏易州滿城縣界清苑
河爲名 沈水在縣北漢縣廢城在今縣東南三
十里後漢省 樊輿城漢樊輿縣也武帝封中山
靖王子修爲樊輿侯後漢省廢城在今縣東南三
十五里一名隅城是也 柏陵城漢爲縣前漢帝

紀云孝武帝封趙敬肅王子終古爲柏陵侯廢城
在今縣南 廣望城漢廣望縣也武帝封中山靖
王子忠爲廣望侯是後漢省故城在今縣西南五
十里 聖女祠輿地志云清苑縣樊輿城西南隅
有聖女祠女姓薛字義姜鉅鹿人嫁爲樊輿王文
妻死于此城之隅就而祭之俗名祭隅城漢元帝
初元三年有天淵玉女鉅鹿仙人者是也

定遠軍

定遠軍

今理東光縣

本景州漢高縣屬平原郡隋置弓高

縣屬渤海郡唐武德四年于縣置觀州領弓高

阜城東光安陵胡蘇觀津七縣六年以胡蘇屬滄
州貞觀元年省觀津縣復以胡蘇來屬十七年廢
觀州以東光胡蘇屬滄州碯縣安陵屬德州阜城
屬冀州貞元二年又于弓高縣置景州又以弓高
東光胡蘇來屬長慶元年廢景州四縣亦還本屬
二年復于弓高置景州太和四年廢縣屬滄州景
福元年復于弓高置景州管東光安陵三縣天祐
五年移州治于東光縣周顯德二年廢景州爲定
遠軍縣屬滄州至六年併弓高縣入東光縣皇朝
太平興國六年割東光縣屬軍

元領縣五

今一

東光

三縣割出

南皮

入滄州

臨津

同上

景城

入瀛州

一縣廢

弓高

併入東光

軍境

東西八十里

南北七十三里

四至八到

西南至東京八百二十里

西南至西京一千二百四十里

西南至長安二千一百里

東至臨津縣八十五里

西至阜城縣六十五里

西至安陵縣四十五里

北至瀛州一百四十里

東南至臨津縣四十七里

西南至薊縣六十五里

東北至滄州一百二十里

西北至景城縣九十里

戶

唐開元戶一萬一千三百

皇朝戶主二千九百八十四客一千二百三十九

風俗

同滄州

土產

舊貢水蔥布

茅簞

海蛤

絹

東光縣

舊十四鄉今四鄉

本漢舊縣也屬渤海郡故城在今

縣東二十里東光故城高齊天保七年移于今縣

東南三十里陶氏故城隋開皇三年又移于此後

魏廢渤海郡郡城卽今縣理郡國志云胡蘇河在

東光縣 永濟渠在縣西二百步 鳴犢河卽寶
鳴犢所過之處故云鳴犢河在縣東南 廢弓高
縣在軍東四十里舊二十一鄉漢縣也屬河間國
漢文封韓頽當之邑莽曰樂成按弓高今屬阜城
縣界弓高故城也晉廢隋開皇十六年復置移于
今理長慶二年正月勅滄州弓高縣宜置景州仍
屬滄州周朝廢州縣入滄州尋又廢入東光 濁
漳水在故城北三十里今邑西一里 候井按郡
國縣道記云漢縣舊地理書並失其所在以理推
之蓋在今弓高縣西北三十五里房將池側近舊

傳此池每日再增再減疑其與海潛通又池形容小有似于井以其增減不失時候因于池側置縣謂之候井歲月既久今按其水不復有增減之候或云今弓高縣卽漢候井縣莫詳所的 西光城隋圖經集記云後魏孝昌三年葛榮畧取其地對東光築之

乾寧軍

乾寧軍

理馮橋鎮

本古盧臺軍地後爲馮橋鎮臨御河之

岸接滄州霸州之界幽州割據僞命升爲寧州周世宗顯德六年收復關南卻爲乾寧軍仍置乾寧

縣

領縣一

乾寧

軍境

東西五十里

南北一百五十九里

四至八到

南至東京一千三百里

西南至西京一千七百里

西南至長安二千七百五十里

東至滄州界二十五里

西至霸州大城縣界二十里

南至滄州界九里

北至東城西胡河一百五十里河北是幽州界

南至滄州界三十四里

西南至霸州大城界十八里

西北至滄州九十三里

西北至霸州大城縣明溝一百五十里

戶

皇朝戶主一千七百八客二百九十九

風俗

與同

土產

潮水所浸惟生蒲葦

乾寧縣

四鄉

舊名永安縣與軍同置在城下太平興國

七年六月改爲乾寧縣

御河在城南一十步每

日潮水兩至其河從滄州南界流入本軍界東北
一百九十里入潮河合流向東七十里於濁流口
入海此水西通淤口雄霸等州水路 盧臺軍古
城在御河南七十步周廻二里基地猶存

破虜軍

破虜軍古淤口關周顯德六年收復關南于此置塞

至皇朝太平興國六年割霸州永清文安縣三百一十七戶屬焉

四至八到

南至東京一千四百里

西南至西京一千六百五十里

西南至長安二千五百里

東至狼城口三十里

南至文安縣五十里

西至霸州五十里

北至幽州二百里